

Q Van
1553





Q var 1553

LA "LAUDA", DI

Oh, bongiorno!... Leverissi...
hinn content che son rivaa?
(Vaa che bestia!... mi i stremissi...)
Si, son mi quell che ha parlaa!...
Mi!... chi dent al scatolon...
Son mi, sciori!... El panatton!

Cià... sù... sveglia... descartémm,
che 'n poss pù de vess saraa...
Sù... fémm festa... saludémm
domandémm come hoo viaggiaa!...
ma sì... cert... l'è educazion,
se saluda el panatton!

Panatton l'è quell amis,
che, s'el riva in d'ona cà,
se anca el riva a l'improvvis,
al va accolt come on pascià!
Perchè lù l'è bell, l'è bon,
perchè lù l'è 'l panatton!

Lù l'è 'l re de l'allegria,
lù l'è 'l dolz de circostanza,
l'è on bombon de compagnia
che ten viscor l'adunanza:
sempr'alegher, mai passion
in doa riva on panatton!

Senza mi, non gh'è Natal...
mi troo insemma la famiglia!
Quanti guai e quanti mal,
col suggell d'ona bottiglia,
l'ha giustaa in del moment bon,
on fettin de panatton!

Perchè mi son ben levaa...
Sott 'sta scorza on poo ruspanna,
color tonega de fraa,
mi gh'oo l'anima ambrosianna
che de foeura l'è a la bonna,
ma de dent l'è panattonna!



EL PANETTON

al
Comm. Ugo Stili
cardinale
Giovanni Barrella
Natale 1961

Pari sgnuzz... e son legger...
I me ughett, foeura hinn brusaa,
ma de dent hinn on butter
e indolsissen col cedraa,
ch'el profuma de limon
tutt el moll del panatton!

Son de pasta prelibada,
la mia crosta l'è on portent,
se anca l'è on ciccin brusada,
la dà nò fastidi ai dent!
Tutt de god... ven finna bon
i fregui del panatton!

E adess basta... hoo ditt assee!
'dess ch'hemm faa la conoscenza,
tirémm foeura del palpee
che ve foo la riverenza,
Eccom... chì... in esposizion,
Sott... chi taja el panatton?

Sù... coragg... tocca a lee, sciora,
damm la prima cortellada...
Tocca a lee, come resgiora...!
'Na maninna delicada,
la rend dolza e la fà bon
fin la fin d'on panatton!

E, intant mè, travers i ughett,
guardand tutt la compagnia,
faroo el cunt in quanti fett
spartirii l'anima mia.
Sù... coragg!... che mena bon
tajà a fett el panatton!

Son squisito?... El soo anca mè!
Mai mangiato de inscì bon!
E, savii perchè l'è inscì?
Perchè sont el panatton,
on bombon de cà, a la man,
che l'è bon 'mè 'l sò Milan.

GIOVANNI BARRELLA



252786
6 SET. 1962

